

16. maj 2017

Inatsisartut suleriaasianni § 36 naapertorlugu matumuuna apeqquteqaat aallaavigalugu oqallinnisamik siunnersuut saqqummiuppara:

Annertuumik innarluutillit sullivinni illersugaasuni ulluuneranilu suliassaqartitsiniarfanni sulinerminni aningaasarsiarisartagaat qanoq pitsanngorsarneqarsinnaanersut pillugu apeqquteqaat aallaavigalugu Inatsisartut oqallinnissaannik siunnersuut

(Inatsisartunut ilaasortaq, Martha Lund Olsen, Siumut)

Tunggavilersuut

Inatsisartut aalajangernikuupput FN-ip Innarluutillit Pillugit Isumaqatigiissutaa Nunatsinnut atuutsinneqassasoq, taamalillunilu innarluutillit inuit allat assigalugit naligiimmik pisinnaatitaaffeqalerput.

Inuit annertusisamik innarluutillit amerlasuutigut tamakkiissumik siusinaarlutik pensiuunisiassa-qalersarput, aammalu sulinerminni tapisiaqalersarlutik akunnermut 15 kr.-imik annertussusilimmik, illersukkamik suliffeqarfimmiissimappata s.a. namminersortuni suliffeqarfimmiippata aammalu pisortat suliffeqarfiutaanni, pisiniarfanni, sullissivinni illersukkani il.il. Aaqqissuussineq pineqartoq aamma naapittarfanni illersugaasuni atuutsinneqarpoq.

Inuit annertusisamik innarluutillit, innarluuteqaraluarlutik malunnaatilimmik sulilluartut suliffeqarfanni privatusuni imaluunniit pisortat suliffeqarfiutaanni, sulisunut allanut atugassaritneqartut assigalugit pineqartariaqarput – assigiimmik akissarsiaqartiterlutik – taamaalilluta FN-ip Innarluutillit pisinnaatitaaffii pillugit Isumaqatigiissutaa naammassissagatsigu.

Naligiimmik aaqqissuussineq amerlasuutigut aamma inunntut allanut isiginnittaatsimut tunggasarpoq, soorlu assersuutigalugu innarluutillit nalinginnaasumik qanoq pineqartariaqarnerannut tunggatinneqarsinnaalluni. Innarluutillit naligiimmik pineqassappata soorlu akissarsiat eqqarsaatigalugit, sulisut allat assigalugit assigiimmik akissarsiaqassapput, immaqaluunniit sulisinnaassusaanut naapertorlugit nalikinnerusutut pineqassappat?

Nammineq naleqassutsimut misigisimaneq amerlaasuutigut aamma tunggatinneqartarpoq inuttut nalimisut imaluunniit naleqartutut pineqarnermit, ilami uani eqqarsaatigaara "inuit allat" inuia-

qatigiinni assigalugit misigititaasariaqartut. Taamaattumik qularinngilara, innuttaasut annertuumik innarluutillit inuussutissarsiorfinniitillutik, SIK'p isumaqatigiissutai naapertorlugit akissarsiat minnerpaaffissaat pisinnaasariaqaraat, taamaalillutik innarluutillip naleqassuseqartutut misigisimanagera annertusingaatiassammat. Innuttaasut annertuumik innarluutillit amerlasuutigut sulisutut aalajaatsuupput.

Innuttat annertuumik innarluutillit ilaatigooriarlutik atorfissaqartittaraluarlugu ilitsersorneqarnissartik, s.a. suliaq qanoq naammassineqassanersoq saniatigullu ataavartumik tapersersorneqartariaqarnissaminnik pisariqartitsisinnaasaraluarlutik, pitsaanerunngila innuttaasut annertuumik innarluutillit sulisumit ikorfartorneqarlutik sulinissaminnut ilitsersorneqalaartarunik taamaaliornikkut 'inuuneq pivusoq' akuuffigalugu, taamaalillutik inuunerissaarnerulerlutik – neriuutiginarluni suleqatinut inuiaqatigiin-nullu nuannaarutaallutillu iluaqutaallualissasut

Inuiaqatigiinnut inuttaanullu pitsaanerussangila, innuttaasut annertusisamik innarluutillit siusinaartumik tamakkiisumillu pensiuunisiinnaratik, siunissami akunnattumik pensiuunisiaqaliinnarsinnaagunik, saniatigullu pensiuunisiartik sulinermik taperlugu soorlu sapaatip akunneranut 20 timenik, timemusiat SIK'p isumaqatigiissutaa naapertorlugu minnerpaaffia najoqqutaralugu. Naalakkersuisup § 37 normu 119/2017-imut akissutaat naapertorlugu inuit pineqartut 79-iupput.

Taamatut tunngavilersuillunga Inatsisartut oqallilluarnissaannik kissaappakka.